

韓大中丞奏議

韓大中丞奏議

受業

曹聯桂

編次

劉廷檢

次孫泰 華敬錄

卷之九

目錄

分賠病故知縣短交銀兩疏

審明殺死一家二命照例定擬疏

據實叅奏疏

請動司庫錢糧趕造剥船疏

委員查勘水患疏

拏獲要犯李庚三疏

搜捕蝻子疏

請對調知府疏

附片

謝賞大清通禮疏

安撫蓮花廳縣被水各戶疏

請免召商接辦疏

審擬萍鄉縣盜犯疏

覆奏查辦會匪疏

審擬義寧州民張世忠京控疏

請知縣對調疏

審擬蓮花廳民周襄甫京控疏

覆勘蓮花等廳縣及續報各縣被水被旱疏

遵 旨查明覆奏疏

審擬豐城縣民熊大邦京控疏

覆查保甲完竣疏

分賠病故知縣短交銀兩疏

奏為病故知縣短交銀兩審明實係挪移恭摺

奏請分賠以清

帑項仰祈

聖鑒事竊照德化縣知縣鄒文炳在任病故當經該  
管知府督飭前後接署知縣並監盤各員清查  
核算共計短交銀一萬八千二十九兩零由道  
府揭經前撫臣成格飭提丁胥來省審辦並查

抄寓所資財僅止破爛衣物估變銀一十五兩  
零復咨江蘇撫臣查封原籍家產亦僅估值銀  
三百五十四兩零此外實無置有房屋財產隱  
匿寄頓情弊移覆到臣行司委員提集丁胥確  
訊去後茲據委員南昌府周繼炘會同九江府  
錢駟審明議擬由司具詳前來臣親加核審緣  
德化縣地方於道光三年五月間被水沖決長  
堤致濱臨江湖之封一等鄉猝被水災該故員

鄒文炳聞報卽在徵存各年屯餘內提銀一千  
六百兩易錢買米親赴各鄉按戶撫卹詎所帶  
銀米不敷分散續提徵存屯餘銀六百兩易錢  
買米馳往散給並復於徵存屯餘項下提銀一  
百二十九兩零雇備小船會同救生船隻沿江  
傍湖拯救災民迨水勢消退確查災民約共十  
萬餘口無所棲依嗷嗷待食該員念切民瘼卽  
在高埠搭蓋篷廠於六月初十日起至二十六



接到賑卹銀兩之日止計十七日共買給過米三千七百餘石因一時無力捐措亦在徵存各年屯餘糧租內動用銀八千二百兩歸還米鋪又三年五月內起解元年屯糧正耗餘租共銀三千一百七十八兩零因驛路水淹改由水路解省船至大江迴峯磯地方陡遇狂風打至石崖將船挫散銀兩沉溺該處水深溜急甚為險要難以打撈該員因沉失銀兩總須賠補隨另

將徵存未解屯餘銀兩補解並未稟報又該縣  
常平倉建設署側內有十二廩共貯穀八千二  
百四十八石零地勢本低三年五六月間江水  
盛漲倒灌入城該廩俱被淹浸時值淋雨連旬  
無可搬貯迨水退天晴逐廩開看統計霉變穀  
四千八百二石零該員慮干叅處起意變價自  
行買補隨將霉變生芽穀石分賣與各城鄉糖  
坊每石得價二錢卽在吳城鎮各米行採買好

穀四千八百二石零運回上倉每石計價一兩一錢共須添補銀四千三百二十一兩零亦在徵存屯糧餘租銀內動用合共挪移銀一萬八千二十九兩零該員本思陸續歸補猝遇病故以致無項可交此該故員因公挪移致未歸補之原委也臣恐或有不實不盡反覆嚴詰據該丁書等僉供當日散給災民口糧有卷冊為據提齊卷冊及傳訊米行均各相符其遭風沉溺

銀兩被水淹浸倉廩霉變穀石均據該府飭縣  
確切勘查屬實委無捏飾情弊案無遁飾查例  
載挪移庫銀一萬兩以上者發近邊充軍又例  
載倉庫及積聚財物主守之人安置不如法晒  
晾不以時致有損壞者計所損之物價坐贓論  
罪止杖一百徒三年着落均賠還官各等語此  
案已故德化縣知縣鄒文炳挪移未交前項銀  
兩已將原籍及寓所田產衣物查封備抵僅估

值銀三百六十九兩零實未完銀一萬七千六百五十九兩零鄒文炳除霉變倉穀輕罪不議外合依挪移庫銀一萬兩以上例發近邊充軍業經病故應毋庸議戶書吳錦成屯書劉裕昆熊從周於本官挪移庫項不行稟阻倉書周達三於倉貯穀石並不預為防範應各照不應重律杖八十折責革役家丁胡忠訊無舞弊情事應請免議該故員寓所原籍均已查封並無資

財隱寄前項挪移銀兩

帑項攸關應卽着落該管之上司分賠以免懸宕  
巡撫藩司各分賠十分之一共銀三千五百三  
十一兩零巡道酌賠十分之三計銀五千二百  
九十七兩零知府名下酌賠十分之五計銀八  
千八百二十九兩零除先將供招咨部並飭司  
造具分攤細數清冊另行送部外臣謹恭摺具  
奏伏乞

皇上聖鑒勅部核覆施行奉

硃批該部議奏

審明殺死一家二命照例定擬疏

奏為審明謀故殺一家二命照例定擬仰祈

聖鑒事竊據泰和縣知縣徐迪惠詳報縣民劉菖員  
殺死無服族叔劉愈洋劉愈青兄弟二命一案  
飭據該縣審擬解司恐案情未確委員覆審由  
臬司邱樹棠詳解前來臣親提研訊緣劉菖員  
與劉愈洋劉愈青同村居住劉愈洋素性強橫  
道光四年三月間竊取劉菖員家園菜經劉菖



員搜獲轉被斥毆勒令賠禮九月間劉葛員在山割得茅草被劉愈洋挑走向討復被毆打五年十一月間劉葛員價買族人劉得仁田畝正欲立契被劉愈洋恃強搶買十二月十八日劉愈洋胞弟劉愈青向劉葛員家借用水桶跌破劉葛員之母柳氏索賠劉愈洋出頭不依將柳氏辱罵推跌劉葛員因屢被欺凌心懷忿恨憶及劉愈洋與伊常在河下挑脚起意俟夜深騙

往殺死洩忿三更時分劉菖員獨自攜帶菜刀  
走至劉愈洋家門首哄稱到有客船劉愈洋攜  
取籬擔同至河邊沙洲挑貨劉菖員乘其不備  
用刀砍傷劉愈洋左太陽連左眉梢左眼角劉  
愈洋舉擔回毆劉菖員用刀格落又砍傷其右  
手大小兩指劃傷左手背並砍傷右太陽連右  
腮腴倒地亂滾喊救劉菖員復用刀疊砍其左  
腮腴腦後連項頸並砍落髮辮殞命時劉愈青

在屋旁牛欄住歇聞喊攜帶鐵尺趕至喝問劉  
菖員刀砍劉愈青下唇吻劉愈青用鐵尺回毆  
劉菖員用刀格落鐵尺乘勢砍傷劉愈青腦後  
倒地墊傷右耳根劉愈青辱罵並稱控究劉菖  
員起意一並殺死又用刀疊砍其頂心連顙門  
額顙並偏左左額角亦卽身死劉菖員走回告  
知伊母柳氏當向埋怨旋經屍父劉得魁等查  
見屍身趕向劉菖員查問劉菖員料難隱瞞自

認先後殺死報驗審解茲臣提犯審據供認前情不諱究無同謀加功之人查劉菖員因被劉愈洋屢次欺凌挾嫌謀殺並因劉愈洋之弟劉愈青趕救復臨時起意一並殺死殊屬兇惡劉愈洋劉愈青係期親兄弟俱係該犯劉菖員無服族叔應同凡論劉菖員合依殺一家非死罪二人斬立決梟示例擬斬立決梟示先行刺字仍將該犯名下應分財產照例酌斷一半給被

殺之家養贍除供招咨部外合將審擬緣由循  
例恭摺具

奏伏乞

皇上聖鑒勅部核覆施行奉

硃批刑部速議具奏

據實叅奏疏

奏為恭摺叅

奏請

旨事竊照各省應徵雜稅錢糧如奏銷時欠解最多  
例應指名叅辦並將催提不力之該管上司

奏明叅處茲江西省道光五年分應徵雜稅銀兩  
據兼署布政使事按察使邱樹棠詳稱截至本  
年五月底奏銷尚有未完銀一萬一百一十七

雨零內除豐城新淦贛縣雩都信豐興國會昌  
龍南安遠長寧瑞金等縣欠解無多應請循舊  
歸於奏銷案內開叅由部照例議處外惟崇仁  
縣欠解銀三千五百三十兩零廣昌縣欠解銀  
一千六百九十四兩零屢催不完呈請

奏叅前來臣查各屬應徵雜稅銀兩例應年清年  
欸乃該崇仁廣昌二縣欠銀自一千數百餘兩  
以至三千數百餘兩之多任催不完殊屬疲玩

相應據實叅

奏請

旨將前任崇仁縣知縣甄別降補佐貳葛東昌前任  
廣昌縣甄別勒休知縣李溫先行摘去頂戴其  
督催不力之撫州府知府經額布建昌府知府  
李本榆一並請

旨交部議處同豐城等縣未完銀兩均勒限三個月  
掃數完解如再延宕卽分別撤任調省嚴查有



無侵挪澈底究辦續叅以昭懲戒除咨吏戶二部外理合恭摺具

奏伏乞

皇上聖鑒內閣奉

上諭韓文綺奏叅欠解雜稅銀兩之知縣一摺江西前任崇仁縣知縣降補佐貳葛東昌欠解道光五年分雜稅銀三千五百三十兩零又前任廣昌縣勒休知縣李溫欠解銀一千六百九十四兩零屢

催不完殊屬疲玩葛東昌李溫俱着先行摘去頂帶並催督不力之撫州府知府經額布建昌府知府李本榆一並交部議處仍同欠解無多之豐城等縣未完銀兩均勒限三個月按數完解如再延宕卽分別撤任嚴叅

請動司庫錢糧趕造剥船疏

奏為遵

旨酌動司庫錢糧墊發承造河口官剥船隻恭摺具

奏仰祈

聖鑒事竊臣接准漕臣陳 咨會具

奏黃河口關捐丁捐剥船應行拆造一摺欽奉

上諭陳 奏查明關捐官剥船身破壞應成造船

一百四十隻丁捐官剥又逾年限應成造九十七

船着照所請交江西省委員成造並於司道庫內  
先將造價動墊行令各糧道及淮安府將應撥銀  
兩照數解赴江西歸欵造竣委員押送到淮交該  
漕督親驗若有草率偷減及器具不全之船駁令  
另造補交等因欽此移江欽遵當卽轉行遵照去  
後嗣據督糧道耿維祜以此項剝船原奏應給  
工料共銀四萬三千一百四十七兩零內除於  
江西道庫扣存銀內應提給銀四千三百九十

八兩外尚需銀三萬八千七百四十九兩零道  
庫無欸可墊請由藩庫先行照數墊發興工等  
情行據兼署布政使事按察使邱樹棠詳稱此  
項銀兩司庫並無閒欸可動惟查嘉慶十六年  
並道光元年承造河口剥船因江浙等省應解  
銀兩未到奏明在於江西藩庫收存地丁銀內  
動撥應用作正開銷應請查照成案在於司庫  
收存道光五年稅契項下動放作正開銷仍由

糧道催追各省銀兩解歸糧道衙門兌收造入  
漕項撥冊內報部撥用等情詳請具

奏前來臣覆加查核與歷辦成案相符除飭司照  
數動放發給熟諳船工之衛弁趕緊購料興工  
照依歷屆長寬丈尺式樣成造完竣由該司道  
驗明解淮如有草率偷減及器具不全等事卽  
責令賠造補交並咨明戶部外理合恭摺具

奏伏乞

皇上聖鑒奉

硃批知道了

委員查勘水患疏

奏為蓮花萍鄉等廳縣猝被水患委員分投查勘  
恭摺仰祈

聖鑒事竊照江西省上游各府屬之山鄉各縣多係  
一線溪河每逢大雨時行卽間有漫溢易長易  
消現據吉安袁州二府先後稟報該府屬之蓮  
花安福廬陵永新萍鄉宜春分宜等廳縣因六  
月二十五六七等日大雨如注山水驟發宣洩



不及民房俱有沖塌人口亦有損傷城垣官舍  
監獄廟宇倉廩間有沖淹處所內惟蓮花一廳  
情形稍重萍鄉安福兩縣次之其餘廬陵宜春  
等縣較輕水勢現已消退所有被水災黎業經  
該府縣捐廉撫卹等情臣當卽督同兼署藩司  
邱樹棠委員齎解銀兩分投馳往各該廳縣逐  
一確勘妥為撫卹無使一夫失所並確查上下  
游各縣有無同時被水切實馳覆辦理查各該

廳縣早禾業已收成卽或有過水之區自可補種雜糧且僅係附近溪河地方被淹不過一隅中之一隅於收成諒無妨礙至損傷人口以及沖塌民房實有若干並城垣官舍等項實在沖淹處所應行分別照例卹給動項修理之處現已札委鹽道齊嘉紹星馳前往督率勘辦其被水小民撫卹後應否加賑均俟覆到再行

奏請

恩施萬不敢稍有隱飾所有蓮花萍鄉等廳縣被水  
現在委員分投勘辦緣由理合恭摺先行具

奏伏乞

皇上聖鑒奉

硃批查明據實奏來

拏獲要犯李庚三疏

再廣東嘉應州民李益幹等京控職員蕭晉璉等欺隱地畝等情一案經廣東督撫臣奏奉

上諭李庚三等藏匿山內恃險負隅藐視官長若不嚴加懲辦何以警頑抗而息刁風着該督等嚴飭將要犯李庚三等緝拏務獲按律究辦等因欽此查江西省贛南一帶界連閩粵山路叢雜匪徒每易藏匿臣與臬司邱樹棠督率地方官隨時

嚴密查緝在案茲據興國縣知縣程儒林稟報  
本年六月初六日據巡役營兵訪有廣東京控  
案內逃犯李庚三潛匿境內協同州民何賡堯  
等在於藍五牯子店內挈獲李庚三訊認前情  
藍五牯子年未及歲悞聽借宿並非知情容畱  
等情由臬司查明實係奉

旨緝拏要犯詳請解歸廣東審辦前來除批令飭府  
會營派委員弁將李庚三解交嘉應州轉解赴

省歸案審辦一面飛咨廣東督撫臣飭審辦理  
外理合附片奏

聞伏乞

聖鑒奉

硃批知道了

搜捕蝻子疏

再沮洳卑濕之區恐有蝻子化生節經臣札飭各屬隨時防範在案茲據德化縣稟報該縣與湖北黃梅縣安徽宿松縣毘連之團洲張家洲現有蝻子萌生湖口縣稟該縣與德化縣張家洲毘連之永和牛湖等洲亦有蝻子跳躍俱各會同地方文武馳往各處多雇人夫晝夜奮力撲捕已去十之八九即可盡淨等情並據九江

府具稟前來臣查該縣等團洲等處係沿江草岸距腹地田禾尚遠當蝻孽甫經跳躍卽捕去十之八九諒可卽時撲滅不致長翅飛騰有傷禾稼除飭司委員會同該府縣督飭地方文武趕緊搜捕並設廠收買小民趨利若鶩庶搜查更為得力以期速盡根株不留餘孽並飭隣近各縣加意防範毋使稍有蔓延外謹附片奏

聞伏乞



聖鑒奉

硃批知道了

請對調知府疏

奏為知府人地未宜遴員請

旨對調恭摺仰祈

聖鑒事竊照知府一官有表率屬員之責必須才與地稱人與地宜始足以專職守而資治理江西省吉安府知府銘惠內務府漢軍進士由編修京察一等道光元年奉

旨補授南安府知府調補今職該府管轄一廳九縣

地方遼濶政務殷繁且民情刁健訟獄甲於通  
省體察江西各府情形惟吉安最為繁劇銘惠  
自調任以來黽勉奉公並無貽悞而才非肆應  
究與此缺不甚相宜查有廣信府知府劉體重  
山西舉人大挑知縣加捐同知籤掣江西  
題署袁州府同知道光四年奉

旨補授廣信府知府該員精明幹練有守有為以之  
調補吉安府知府足資整頓其廣信府一缺雖

同係繁要而人情質實治理較易卽以銘惠調  
補洵堪勝任惟該員等均係以繁調繁與例稍  
有未符但人地實在相需據司道等詳請具  
奏前來臣韓文綺與臣琦善往返札商意見亦復  
相同合無仰懇

聖恩俯准將廣信府知府劉體重調補吉安府知府  
其廣信府缺卽以銘惠調補如此一轉移間人  
地各得其宜於地方公事均有裨益如蒙

俞允該員等因人地相宜酌量對調與實在不勝繁  
缺者不同且均係現任知府銜缺相當應請毋  
庸送部引

見臣等為地方起見謹合詞恭摺具

奏伏乞

皇上聖鑒奉

硃批另有旨內閣奉

上諭琦善等奏知府人地未宜請遴員對調一摺着

照所請江西吉安府知府員缺准其以劉體重調  
補所遺廣信府知府員缺卽以銘惠調補該部知  
道

附片

再江西省吉安廣信兩府均係有漕地方現已將屆收納漕糧全在該管知府督屬妥辦今吉安府銘惠廣信府劉體重已經臣等

奏請對調應請飭令各赴調任以專責成惟吉安府又有勘辦蓮花安福等廳縣被水事宜情形更為緊要應先令劉體重馳赴吉安接印仍會同銘惠妥協辦竣後再令銘惠前赴調任其廣

信府印務查有南康府狄尚綱在江年久老成  
穩妥堪以暫委署理所遺南康府缺查有袁州  
府同知朱楣明白勤謹堪以委令接署俟銘惠  
到廣信後再令次第交卸各回本任以期公事  
均無曠悞又都昌縣曹人傑委護南昌府同知  
所遺都昌縣係屬要缺查有弋陽縣張玕精明  
幹練堪以委署又東鄉縣徐樂山委護瑞州府  
銅鼓營同知所遺東鄉縣缺查有甫經交卸南



安府同知之雋都縣黃濬安詳謹飭堪以委署  
據藩臬兩司具詳前來除分檄飭遵外理合附  
片陳明伏乞

聖鑒奉

硃批知道了

謝賞大清通禮疏

奏為恭謝

天恩事竊臣齎摺差弁回江奉到

恩賞續纂大清通禮全部當卽恭設香案望

闕叩頭祇領欽惟我

皇上治光泰寓

道協乾符

建極敷言徵無黨無偏之化

恭壽堂奏議

卷九

四

原經立教著有典有則之文本

家法以成書緣人情而制禮溯乾隆丙辰之歲始纂通  
禮初編迨嘉慶己卯之年復

命儒臣重緝我

皇上寅承

昊眷敬紹

顯謨思

文纘緒納天下於軌物之中繩

武觀成酌古今於範圍之內安民定志既經曲之成周  
因時制宜實文質之各當書該五十四卷事增  
六十餘年述

祖德以垂型全帙與地天同節弁

聖言以作則

大文並日月齊輝臣任忝封疆才慚弁陋敬聞

彛訓悉秉

宸裁迺荷

頒賜之榮倍欽

中和之致從茲率由有自俾無斁於彝倫欣看嘉會

咸宜克永昭夫法守

化成久道無非宅中馭大之謨

德徧羣黎益茂咸五登三之治所有臣欽感下忱謹

繕摺叩謝

天恩伏乞

皇上聖鑒

安撫蓮花廳縣被水各戶疏

奏為蓮花等廳縣猝被水患委員查勘安撫仍請  
照例撫卹並藩司馳往覆勘恭摺奏祈

聖鑒事竊照蓮花等廳縣因六月二十五六七等日  
大雨如注山水驟發宣洩不及以致淹斃人口  
並沖塌民房等項經臣委員分投往勘恭摺

奏明在案臣因該廳縣陡遭水患被水居民恐致  
失所不可不迅速撫卹隨督同藩司公捐銀兩

酌量被水輕重分別銀數多寡委員分投齎往  
妥速撫給去後茲據委員鹽道齊嘉紹督同印  
委各員勘報水由萍鄉之武功楊岐兩山發源  
因溪河逼窄暴漲難消以致該廳縣均被水患  
各居民田浸屋塌風棲露宿口食無資困苦情  
形深堪憫惻當將捐發銀兩並地方官捐廉及  
紳士捐助按戶酌量安頓復減糶倉穀接濟民  
食尚可無虞失所惟水患驟至窮黎貯蓄均被

漂沒雖已捐資口食仍應照例撫卹並酌請緩徵以紓民力至沖塌民房淹斃人口除有力之家並官為捐給外餘仍查明數目照例卹給沖塌城垣衙署監獄等項浸濕常平倉穀軍裝火藥淹斃馬匹同淹沖田畝均俟催查確數另行照例詳辦查勘實在情形惟蓮花廳為最重萍鄉永新宜春安福廬陵分宜等縣以次較輕其未經過水之區晚禾仍屬暢發合通省而論不



過一隅中之一隅且水勢消退甚速不致成災  
等情臣查該廳縣被水貧民雖經臣飭令委員  
及地方官等妥為查勘安撫民情已屬靜謐但  
該貧民等驟被水沖廬舍蓋藏一旦蕩析卽妥  
速安頓亦祇可暫濟一時合無仰懇

天恩俯准將蓮花萍鄉永新宜春安福廬陵分宜等  
七廳縣被水各戶無論極次貧民查明戶口除  
先經捐資口食不計外仍照例普行撫卹一月

折色口糧以資接濟其沖坍房屋淹斃人口並  
查明水沖沙壓田畝除有力之家並已經捐給  
外均請照例卹給由藩庫發銀嚴飭各該管道  
府督同印委各員核實散放務使貧民均沾實  
惠勿令吏胥侵蝕事竣取造細冊照例分別

題報核銷至該廳縣被沖田畝現在節氣已遲卽  
趕緊墾復祇可補種雜糧難免拮据若照常徵  
收力有不逮應請將本年未完錢漕緩至來年

秋後分作兩年帶徵俾民力更臻寬裕頂感

聖慈益無既極現在藩司繼昌將到任一切事宜理  
有頭緒稟請親往履勘督辦前來臣卽飭令星  
馳前往履勘親查督辦並飭將沖坍城垣浸濕  
倉穀等項及動借平糶各倉穀數目同沙壓田  
畝能否挑復並各紳士捐助銀錢分別查明照  
例辦理再臨江府屬之新喻縣地居分宜縣下  
游間有被水浸淹沖坍房屋其未被水處所七

月缺雨禾苗黃萎現在委員會同該管知府勘  
詳其吉安府屬之吉水縣亦報被旱委員往勘  
泰和縣沿河一帶亦因上游水發間被淹浸業  
經該縣勘明捐廉撫卹據報田禾無碍應並令  
該司一併查勘核辦所有查辦被水情形及續  
勘被水被旱處所並藩司馳往履勘督辦緣由  
理合恭摺具

奏伏乞

皇上聖鑒訓示

內閣奉

上諭韓文綺奏勘明被水廳縣請照例撫卹一摺江  
西省蓮花等廳縣本年因山水驟發淹斃人口並  
衝塌民房等項經該撫委員勘明業已捐給口食  
惟窮黎貯蓄均被漂沒卽墾復田畝祇可補種雜  
糧民力未免拮据着照所請准將蓮花萍鄉永新  
宜春安福廬陵分宜等七廳縣被水各戶無論極

次貧民查明戶口除先經捐資口食不計外仍照例普行撫卹一月折色口糧俾資接濟其衝坍房屋淹斃人口並水衝沙壓田畝除有力之家並已經捐給外均着照例卹給由藩庫發銀卽飭各該管道府督同印委各員覈實散放嚴禁吏胥侵蝕務令實惠及民事竣覈實報銷至該廳縣本年末完錢漕並准其緩至來年秋後分作兩年帶徵以紓民力其餘被旱被水各州縣着一併查明覈辦

該部知道

請免召商接辦疏

奏為故商原遺爐廠久經停歇無人接充恭摺具  
奏仰祈

聖鑒事竊照江西南安府屬之上猶縣營前蕉裡等  
處地方出產鐵砂經前撫臣秦 於嘉慶十

年咨准部覆准令商人賴軒於曉水地方添設  
一廠兩爐納課鑄鐵至嘉慶十四年五月內該  
商病故伊子無力承辦咨部覆准銷除商民歇



業行令查明該故商自充商日起至病故日止  
如有拖欠稅銀卽入專案報銷案內報核並召  
殷商接充等因當經前撫臣轉行遵辦嗣因屢  
召無人接充隣商自承厥爐亦因鐵苗衰微辦  
課納稅諸多賠累勢難兼辦由該府縣節次詳  
經各前任撫臣批飭委員查勘實在砂炭斷絕  
無人接辦等情又以課稅攸關另委大員確勘  
妥議辦理去後據前任贛南道汪全德督同該

府縣親詣屢勘廠屋爐座自賴軒病故停歇後  
久已坍塌無存炭源消乏鐵苗衰竭委屬實在  
情形該故商自充商日起至嘉慶十四年病故  
之年底止應完稅銀並無拖欠至消除商名之  
後爐座停歇無人接充隣商亦未兼辦並無應  
納稅銀取具各結由布政使繼昌詳請具

奏前來臣查上猶縣曉水地方添爐鑄鐵因地利  
衰旺無定原咨案內聲明砂旺增爐倘或衰竭

分別停移今該處既已商故爐停砂炭斷絕無人接充應免其召商接辦致滋抑勒紛擾除咨部外理合恭摺具

奏伏乞

皇上聖鑒勅部核覆施行

審擬萍鄉縣盜犯疏

奏為遵

旨審擬具

奏仰祈

聖鑒事竊臣承准軍機大臣字寄欽奉

上諭據都察院奏江西萍鄉縣民婦簡蕭氏遣抱告  
簡懷茂以羣盜夤夜網搶輪姦等詞呈控據供該  
縣並不親勘僅據典史捏詳並無網縛形跡控府

亦不收呈隨稟協鎮會同拿獲修冬古供認同夥  
十二人鍾煜華等串勒伊嫂勿論輪姦改稟和息  
伊嫂不允嗣獲李光海供認三月之內網搶四姓  
輪姦伊嫂及文姓寡婦處女不諱知縣並不按名  
嚴拿以致盜益猖獗續控巡撫該縣復將伊拘責  
酷刑幾死等語如果屬實殊出情理之外着韓文  
綺督同臬司邱樹棠親提嚴訊如該府縣意存消  
弭竟有化大為小情事據實嚴叅等因欽此當查

萍鄉縣事主簡相能家被盜行劫拒傷並輪姦  
簡相能之妻蕭氏一案又事主葉榮梅被劫一  
案先已獲犯李光海等訊認按擬具

題准部核覆奉

硃批是秉公審訊不可存袒護消弭之心欽此旋准  
遞到抱告簡懷茂並委員查明萍鄉縣上年盜  
案除簡相能葉榮梅二案外黃竹坪地方並無  
曾姓被劫之案僅止上年正月間文李氏報竊

一案飭傳文李氏到案據供實止被竊並無強劫輪姦求免解省取具文李氏供詞並將文李氏之夫弟文成生連全案人卷一併解省委員訊供由臬司審解前來臣隨細核各卷提齊犯証督同臬司邱樹棠逐一隔別研訊緣簡蕭氏之夫簡相能家於道光五年三月初十日夜被已獲盜犯李白腦商同曾滌塵李光海修冬古及未獲之李光太等一共八人撬門行竊臨時

行強撞門進內李白腦等劫出錢文衣物遞交  
修冬古等接收先走曾滌塵李光海轉身復劫  
曾滌塵起意商同李光海將簡蕭氏用繩綑縛  
揪按輪姦三月十一日夜曾滌塵邀同已獲李  
光海李長古等行竊葉榮梅家猪隻臨時行強  
撞門入內搜劫贓物事主簡相能葉榮梅投保  
報經前署縣李景昌先後詣勘勒緝簡蕭氏因  
病已回母家未經取供簡相能於四月十三日



赴郡呈控袁州府趙璠甫經到任尚未放告簡  
相能卽赴袁州副將衙門具呈移府先後飭委  
文武各員赴縣協拿該前署縣李景昌因地方  
連日被劫必須設法嚴拿查有已革捕役劉標  
從前捕盜得力諭令幫捕許俟獲盜詳請復卯  
該縣典史朱銘因簡相能之案係其分轄界內  
督率捕書鍾煜華並劉標等訪緝時有監生吳  
欽名童星輝先與劉標口角有嫌見其隨同典

史訪緝疑係典史舉薦卽以典史舉薦劉標通盜遠遁情詞列何廷湖等之名赴縣呈控該前署縣李景昌以所呈毫無憑據批飭該縣先於四月十二日拿獲修冬古訊認行劫簡相能家同夥八人並供出首盜李白腦逃匿地方該縣李景昌恐同夥不止此數向其嚴詰修冬古妄認同夥十一人據供懸賞緝拿續獲李白腦曾滌塵李長古訊認強却不認輪姦屢傳簡蕭氏

赴案指認未到據供通詳簡蕭氏因屢被差傳  
不甘卽倩生員張其黼作詞以縣欲勒去輪姦  
差拘苦累等情赴府司暨前撫臣呈控批府督  
審嗣經高安縣協獲李光海訊認強劫簡相能  
葉榮梅二案並輪姦簡相能之妻簡蕭氏屬實  
該縣以該犯連日強劫必尚有另劫別案亦向  
嚴究李光海畏刑因知隣近之文李氏家被竊  
妄認強劫文姓輪姦寡婦處女並妄供劫過黃

竹坪地方曾姓事主將李光海解回萍鄉縣提  
訊翻供解府督同宜春縣程國觀萍鄉縣張仝  
研訊並據簡蕭氏赴案指認係被曾滌塵李光  
海二人輪姦該犯等無可狡賴俱卽供認究明  
實止同夥八人並無強劫文姓輪姦婦女亦無  
盜劫曾姓情事將犯審擬解司委審仍照原擬  
由司解經臣審擬具

題維時袁州府趙璠訪聞該縣生員張其黼被控

唆訟之案累累飭縣拘訊恃符不認經縣另案  
詳草審辦簡蕭氏心疑張其黼被革由於該氏  
倩令作詞所致不知案已據實審辦因修冬古  
等先供盜數與復審不符恐致輕縱且有夥盜  
未獲心懷忿恨起意遣夫弟簡懷茂赴京呈控  
憶及典史曾帶書役赴伊家查勘卽指為串同  
書役鍾煜華劉標勒令勸和吳欽名等呈控劉  
標通盜遠遁被縣批飭卽指為該縣意圖輕縱

並捏刑書王家玉喝責各情。令伊戚蕭子鳳  
做就呈詞。因乏盤費。吳欽名童星輝各帮盤費  
錢九千文。簡懷茂卽赴京呈控。經都察院奏奉  
諭旨解回審辦。茲經提訊各供前情不諱。嚴究此外  
並無強劫輪姦別案。臣恐該府縣實有消弭化  
大為小情事。再三嚴詰。並以該犯等卽有盜劫  
別案罪無可加。反復開導。不特盜犯李光海等  
堅供不移。卽簡蕭氏亦供明盜犯僅止八人輪

姦僅止二犯所控諱盜勒和各情實係心疑妄  
控簡懷茂亦供無拘責酷刑情事復又明查暗  
訪與各供吻合案無遁飾查此案情節覆訊均  
與原題無異盜犯李光海曾滌塵強劫輪姦應  
仍照原擬依強盜姦污人妻女例斬決梟示曾  
滌塵監斃仍戮屍梟示李白腦起意糾劫依強  
盜已行得財律斬決現已審明未便再事稽誅  
卽欽遵前奉

諭旨將李光海李白腦綁赴市曹分別處決仍將李  
光海曾滌塵首級傳赴犯事地方懸竿示衆以  
昭炯戒李長古接賊一次情有可原應照部議  
發新疆給官兵為奴修冬古接賊一次亦例得  
減等該犯供出首盜李白腦逃匿地方照例擬  
杖一百流三千里分別刺字發配簡蕭氏呈控  
被劫拒傷輪姦重情俱已得實應照重事告實  
律免罪與聽囑作詞之蕭子鳳赴京抱告之簡



懷茂均毋庸議監生吳欽名童星輝因劉標係屬草捕隨同典史緝案疑係典史舉薦卽行具控又幫給簡懷茂京控盤費均屬多事應照不應重律杖八十係監生照律納贖已革生員張其黼為簡蕭氏代作呈詞亦有不合惟尚有赴京呈控被縣究革另案應歸彼案咨結典史朱銘訊非捏詳亦無串同鍾煜華劉標勸和情事應與訊無喝責之刑書王家玉均免置議前署

萍鄉縣調任彭澤縣知縣李景昌拿獲盜犯修  
冬古在簡相能赴郡具控之前尚無諱盜消弭  
及化大為小情事惟革役例禁復充該縣李景  
昌令革捕劉標作線捕盜原所不禁乃許俟獲  
盜詳請復卯雖尚未詳請究屬違例相應附叅  
聽候部議逸盜李光太等飭緝獲日另結除將  
供招咨部外合將審擬緣由恭摺具

奏伏乞

皇上聖鑒敕部核覆施行奉

硃批刑部議奏

覆奏查辦會匪疏

奏為遵

旨據實覆

奏仰祈

聖鑒事竊臣承准

廷寄欽奉

上諭御史熊遇泰奏會匪擾害地方請旨敕查一摺  
據稱江西贛南一帶近有匪徒燒香結盟名為添

刀會又名千刀會聚黨數百人沿途劫掠上年冬間興國雩都瑞金地界疊劫商販至五十餘起又有泰和縣馬家洲郭姓被劫貲財萬餘金迄今未獲破案並聞會匪與鹽梟勾結如泰和之馬家洲萬安之白渡市私梟充斥每借刀會為聲援放礮闖關蔽江而下又有匪徒創立花會製為三十六字號三十六天罡令人射取打中者數十倍償之此風興國雩都吉水泰和永豐等處為尤甚其中

多有流入刀會者非尋常賭局可比等語匪徒創立會名久干嚴禁如該御史所稱會匪聚黨劫掠頻仍甚至鹽梟借刀會為聲援肆行無忌地方文武各員所司何事至花會聚衆賭博亦應嚴行查禁免滋事端着韓文綺督同臬司邱樹棠將該御史所奏前項各情逐加訪察飭屬認真查拿毋稍疎縱至該御史所稱各鄉選擇鄉耆舉為鄉約並於衝要地面移駐一二文武員弁專司緝捕是否

可行並着體察情形據實具奏等因欽此仰見

聖主戢暴安良綏靖閭閻之至意臣循環跪誦感悚  
難名當卽恭錄傳知臬司邱樹棠欽遵查照伏  
查南贛一帶界連閩粵每有匪徒潛匿境內糾  
結拜會情事臬司邱樹棠到任曾經嚴飭查拿  
臣於上年十一月履任復經札飭嚴拿解辦據  
南安贛州吉安各屬先後拿獲會匪唐興通魏  
招仔蔡三三陳笑棗李年孜劉達文劉石仔賴

澄召汪茂橋楊洪順李惻標趙羊巴腦謝其華  
王恭泰張大松曾德音廖壬牯子巫世蘭劉定  
桂楊棕講等各案計犯一百六十餘名究明該  
犯等煽惑拜會授帖傳徒騙錢花用名為添弟  
會又名三點會其中亦有帶刀防身者民間因  
卽目為千刀會並非該犯等另有是項會名卽  
如已獲之汪茂橋等被獲時在其船內起有尖  
刀再三嚴詰實係防身防夜所用卽該犯等訛



詐擾害原所不免亦無沿途劫掠情事業將各犯按照會匪之例擬絞遣流徒分別

奏咨完結其瑞金興國等縣地方聞有迭劫數家之事卽經飭查該縣等先已訪聞跣緝旋據瑞金縣報獲周三女子蔡長頭髮等九名又據興國縣報獲陳盛材等八名究明該犯等於道光四年十二月初四十二等日並五年正月初四二月二十九等日先後糾劫瑞金縣事主朱勝

選劉成琳賴俎珀興國縣事主黃幅盛等家賊  
物並將賴俎珀弟婦賴蕭氏黃幅盛之媳黃劉  
氏輪姦該犯蔡長頭髮等又先於四年十一月  
二十七日在寧都州九斷嶺地方搶奪不知姓  
名過客行李拒捕致斃一並提省審辦分別擬  
以斬梟斬決經臣審

題現候部覆在案是該御史所奏興國瑞金地方  
被盜疊劫正與此案情形大致相符並無另有

商販被劫五十餘起報案亦無零都詳報被劫  
之文至泰和縣馬家洲郭姓被劫貲財萬餘金  
一節檢查道光四年七月內有在泰和縣馬家  
洲開張茶店之劉芝材因失去錫壺路見郭良  
鐸錫舖內錫壺相似向取被斥糾同販私擬軍  
釋回之高廷鑑往搶郭良鐸店內錫壺洋銀等  
物並將店隣郭峻洋銀錢文一併搶走估計郭  
良鐸搶賊值銀五兩五錢郭峻搶賊值銀三十

一兩零將劉芝材等擬以杖徒咨結並無被搶多賊亦無另有郭姓呈報被劫萬餘金之事卽泰和萬安等縣拿獲鹽犯劉義童賴井仔蕭思亮黃其華等各案訊係販私屬實按律擬辦本年五六月間萬安縣地方有私梟闖卡拒傷兵丁之案亦經獲犯曾泳英等現在審辦該犯等並無借刀會以為聲援之事花會賭博起於福建流及江西道光五年八月內據新城縣拿獲

籍隸福建永春州向在新城營生之陳萬糾同  
張世榮等搭寮開場花會聚賭捏造人名三十  
六個寫貼壁上每日暗寫一名裝入竹筒聽人  
猜壓如有猜中者每錢一文賠錢三十二文誘  
人猜壓贏錢分用當將陳萬等分別問擬軍徒  
咨結此外未據報有花會之案此近年查辦會  
匪盜匪賭匪之實在情形也至應否選舉鄉耆  
一節伏查乾隆七年前撫臣陳宏謀曾設選舉

族正之法令各族公舉平日為人正直端方者  
呈報州縣查驗立為族正教誨族衆如有乖戾  
之徒小則處以家法重則送官究治如一二三  
年內族衆並無違犯科條分別給匾獎勵倘怠  
惰徇私亦卽斥革懲儆另舉接充若地方官認  
真照辦江西省鄉村地方每多聚族而居一族  
中舉有公正族正令其勸諭本族各安恒業毋  
任滋事如有會匪鹽梟賭匪等類卽令協同保

甲據實舉報在不安本分者恐族正舉發不敢  
作奸為匪卽該族正亦恐自干斥革不敢怠惰  
徇私一族如此族族如此行之日久定必比戶  
可封亦編查保甲中之一良法也自可酌量奉  
行又衝要地面應否移駐文武員弁稽查一節  
贛縣大湖江地方私鹽出沒查察難周請將贛  
州府通判移駐查察經部覆准在案萬安縣芙  
蓉門為粵私必由之所緝捕最關緊要前經兩

江督臣孫玉庭奏由贛鎮添派叅將大員並酌  
委丞倅一員駐守巡緝本年經兩淮鹽政臣曾  
燠委員來江會同地方文武周厯查勘又議於  
芙蓉門上游之觀瀾門添設一卡並設立望臺  
撥兵駐守瞭望以壯聲勢現在確勘辦理又據  
信豐縣稟報該邑小河堡民情强悍地甚繁要  
請移駐專閫武員彈壓已飭道府查議應俟復  
到再行核定若有必須改駐之處臣尤當隨時



斟酌辦理此又選舉族正移駐員弁應行酌辦之情形也臣伏思會匪之騙錢鹽梟之牟利以及花會賭博皆有首惡者為之倡而愚民無知遂致被其引誘倘能將為首者嚴辦示懲而被脅被誘之人定可紛紛解散化莠為良臣現在督飭臬司刊發告示曉諭各鄉紳耆保良攻匪並令被脅被誘之人若能將首惡指引到官不但寬其應得之罪並另給予獎賞倘挾嫌攻訐

卽照例坐誣如此則從犯知難犯之條必趨自  
新之路而首犯恐同夥之攻必無托足之區閭  
閻庶可期其靜謐仍一面遴委幹員改裝易服  
馳往各處密查並飭道府明查暗訪如有前項  
會匪劫掠及鹽梟勾結花會聚賭各情地方官  
憚於緝捕諱匿消弭及化大為小卽據實揭報  
不任稍有隱飾臣與臬司邱樹棠均受

恩深重深懼才識未周無以仰酬

高厚於萬一今蒙

聖明指示惟有殫竭血誠如地方有應行興舉之事  
斷不敢畏難苟安倘各屬文武怠玩因循不以  
緝捕為事亦卽嚴行叅辦萬不肯稍存姑息自  
蹈愆尤所有現在凜遵查辦緣由理合恭摺覆  
奏伏乞

皇上聖鑒訓示奉

硃批總要認真查辦勿蹈模稜徇庇之習戒之勉之

審擬義寧州民張世忠京控疏

奏為遵

旨審擬具

奏仰祈

聖鑒事竊照義寧州民張世忠以藍金蓮等傳習邪教伊叔張迪光控州不為准理並羅列各案輕縱不究各情控經步軍統領衙門具

奏奉

旨此案着交韓文綺督同臬司邱樹棠親提人證卷  
宗秉公嚴審按律定擬具奏原告張世忠該部照  
例解往備質欽此並准將張世忠咨解到江遵卽  
督飭臬司邱樹棠行提人卷解省審辦旋據該  
州稟覆張迪光牽控已結盧谷年查敬約二案  
人證患病外出無從拘解又周崧魏芳洲二案  
人證赴州投訊均因被張迪光借貸不遂捏控  
籲求免解夏文興查拘無獲取有族隣切結同

應訊人等一併解省委員審辦並飭傳僧綱司  
辨認張迪光原呈令牌係僧道常用之物符本  
並無違碍由臬司審解前來臣細核各卷張迪  
光所控各案或已經訊結或事不干己惟所控  
北村藍金蓮與呂南品拜香畫符鍊刀傳習邪  
教一案如果獲有符書何以該州不為准理邪  
教乃風俗人心之害實為此案緊要關鍵卽所  
控夏文興袁必坤兩案均係傳習邪教亦應嚴

切根究隨提人證督同臬司邱樹棠逐一隔別  
研訊緣張迪光籍隸義寧州原捐從九品職銜  
嘉慶十四年因州民周化池京控案内問擬杖  
革十七年張迪光赴京翻控審虛問擬滿徒親  
老畱養其所控藍金蓮呂南品傳習邪教一節  
訊因嘉慶十九年張迪光將衆建廟宇租人居  
寓呂南品不依吵鬧道光二年陳後芬承買張  
迪光家公衆山場寫立契券張迪光訛詐不遂

三年十月萬益明挑柴售賣誤碰張迪光妻姪  
店內工人張迪光囑萬益明賠禮不依五年四  
月謝名志撞遇素好之蕭子居與張迪光飲酒  
張迪光囑蕭子居一同赴京告狀謝名志勸阻  
張迪光均懷嫌隙藍金蓮與張迪光交好張迪  
光資其食用料肯幫扶遂誣列藍金蓮呂南品  
將邪術教令陳後芬等學習並恐無所證據將  
拾獲之符書令牌指為藍金蓮等處誘獲藉以



證實遣姪張世忠赴京呈控迨經解回審辦經  
州拘獲藍金蓮等管押張迪光因藍金蓮貧老  
易誘乘其管押無人看顧央戚趙能立送給錢  
文衣服囑其供認傳徒習教並告以年逾七十  
亦不治罪藍金蓮不依經州將趙能立一併解  
質訊悉前情是藍金蓮呂南品習教一案已屬  
虛誣又所控夏文興袁必坤傳教兩案訊因張  
迪光同族張掄元身故賴拱宸經手散帛因張

迪光平素多事為伊族不齒未給帛布因此挾嫌夏文興與張迪光素識夏文興向在徵村一帶傭趁張迪光曾向借錢不允亦有嫌隙遂平空捏指夏文興在徵村鍾姓傳教被賴拱宸呈控不究希圖拖累袁必坤之弟袁必榮同潘文球等延請黃永寬學習拳棒以防盜賊經地保李怡茂聞知稟官查拏將袁必坤同隣佑傳訊實係袁必榮等學習拳棒均各具結另行查拘

黃永寬等究辦張迪光因此牽控希圖聳聽是  
所控傳習邪教最關緊要之案均屬虛誣其餘  
羅列各案如邱元芳被野獸咬去鷄隻追至蕭  
子安山上找尋經看山之蕭祥錦疑賊互毆張  
迪光卽唆令蕭子安砌捏邱元芳等竊樹拒捕  
並令誣控邱元芳勾引素有嫌隙之鄧高魁等  
肆竊旋據蕭子安自首經州訊明飭拏是以牽  
控又如儒童賴大紳之妻徐氏節孝經職員胡

秉銓等呈報儒學查明移州詳辦張迪光因徐氏係捕役徐勝之女央李鈞元轉向訛銀被斥砌詞控告潛逃李鈞元被控包訟撞騙久已分別訊結查無其事張迪光因懷挾被斥之嫌是以牽控又如黃許氏係何達巨義女黃許氏因竊隣人鷄隻查覺被翁姑責罵央何達巨帶往新昌縣往尋伊父許文龍被縣差疑係拐帶送縣訊供移州訊明並非拐帶取保張迪光以拐

帶重案州不究辦藉以挾制是以牽控又如耆民周崧經生員彭肅雲等舉報鄉飲開列衆賓張迪光曾送聯對作賀並非曾經問擬枷杖之周作霖張迪光因向借錢不允是以牽控又如生員魏廷聘孝行至篤經職員龔旭等舉報由學查明移州詳報批查未據覆到張迪光捏以因畱仙姑判斷禍福並賄囑舉報各情實因向魏廷聘之孫魏芳洲借銀不遂是以牽控又如

盧谷年等始控州書浮收繼因查明並無浮勒  
呈請銷案張迪光因係告漕之案藉圖挾制是  
以牽控又如查敬約等喫齋祈福被熊迪千控  
告訊非邪教責懲完案張迪光欲證實邪教重  
案是以牽控以上各案均以審屬子虛嚴訊因  
何控告據供知州曾暉春到任訪知該犯在州  
唆訟滋事督同巡檢時刻查拏實無容身之地  
是以捏造邪教各案知州不辦差役楊襄等舞

弊拳賊各重情藉圖聳聽並將平素有嫌之人  
任意填砌入詞希冀拖累其實令牌符咒在途  
拾獲並非誘獲亦無另獲夏文興符本犯約並  
無在州控告不准之事委係平空誣捏再三究  
詰矢口不移案無遁飾臣以張迪光雖控無確  
憑現均認誣惟義寧州西北鄉民間向多信鬼  
尚巫曾經前撫臣

奏明飭禁今藍金蓮等住居北鄉被控之夏文興

又未獲案恐有不實不盡復又密委妥員前往  
確查徵村地方並無鍾姓相距徵村數里之檀  
坑地方始有鍾姓十餘戶均查無夏文興傳教  
被獲符書寫立犯約之事亦無賴拱宸呈控州  
判案據其為捏控無疑查張迪光先則因訟問  
擬杖革繼又誣告擬徒畱養乃不知安分復又  
迭次訛借唆訟經官訊明飭拏復敢挾嫌平空  
捏控藍金蓮夏文興袁必坤等傳習邪教重情



主令其姪張世忠赴京呈控並牽扯已結與伊  
無涉各案妄誣多人實屬生事擾害張迪光除  
驀越赴京告重事不實罪止邊遠充軍輕罪不  
議外合依兇惡棍徒屢次生事行兇無故擾害  
良人例發極邊足四千里安置張世忠悞聽伊  
叔張迪光赴京呈控與為從不同應照不應重  
律杖八十趙能立代送錢衣傳述語言訛非知  
情串誣應照不應輕律笞四十各折責發落蕭

子安聽唆誣控邱元芳等竊樹拒捕事出有因  
已據自首與邱元芳等先經州審責懲應免重  
科周崧訊非周作霖改名魏芳洲亦無賄囑不  
法別情應與訊無傳習邪教之藍金蓮等均免  
置議賴徐氏之父徐勝曾充捕役其夫家清白  
且婦人以名節為重是以僕婦婢女及捕役之  
妻俱例准

旌表徐氏青年矢志事同一律業經題准請

旌應毋庸議其餘已結各案原斷均無輕縱張迪光  
詞內所指李邱氏夫故自縊張劉氏夫故守節  
均查無報案飭州確查照例辦理符書令牌案  
結銷燬無干省釋該州西北鄉民信鬼尚巫仍  
督飭隨時查禁除將全案供招咨部外理合恭  
摺具

奏伏乞

皇上聖鑒勅部核覆施行奉

硃批刑部議奏

恭壽堂奏議

卷九

五七

請知縣對調疏

奏為知縣人地未宜請

旨對調仰祈

聖鑒事竊照知縣責膺民社必須人缺相宜庶足以  
資治理茲瑞州府屬新昌縣知縣馮文燦順天  
進士分發江西補授今職道光五年八月到任  
該縣民情刁健訟獄繁多該員抵任以來黽勉  
奉公尚無貽悞惟才具未能開展究與此缺不

甚相宜查有饒州府屬德興縣知縣宋大寅雲  
南進士分發江西補授今職道光四年二月到  
任該員年壯才明辦事幹練以之調補新昌縣  
知縣足資整頓所遺德興縣缺民情樸實治理  
較易卽以馮文燦調補洵堪勝任惟該員等到  
任均未滿三年且同係中缺與調補之例稍有  
未符但人地實在相需據藩臬兩司詳請具  
奏前來合無仰懇

聖恩俯准將德興縣知縣宋大寅調補新昌縣知縣  
其德興縣員缺卽以馮文燦調補如此一轉移  
間人地旣各得其宜而於地方公事亦均有裨  
益如蒙

俞允該員等因人地相宜酌量對調且均係現任知  
縣銜缺相當毋庸送部引

見臣為地方起見謹會同兩江總督臣琦善恭摺具  
奏伏乞

皇上聖鑒訓示內閣奉

上諭韓文綺奏知縣人地未宜請揀員對調一摺着  
照所請江西新昌縣知縣准其以宋大寅調補所  
遺德興縣知縣員缺卽以馮文燦調補該部知道



審擬蓮花廳民周襄甫京控疏

奏為遵

旨審擬具

奏仰祈

聖鑒事竊照蓮花廳民周襄甫以李元棕等與伊姪  
周迪萬爭山率衆持械將伊姪毆傷身死歷控  
不為究辦又周廣萬罵母致母李氏自縊身死  
誣伊細毆搶去銀錢什物不完等情控經步軍

統領衙門具奏奉

旨此案着交韓文綺親提人証卷宗秉公嚴審按律  
定擬具奏原告周襄甫該部照例解往備質欽此  
並准將周襄甫咨解到江當查周迪萬係被劉  
席畛等共毆身死將劉席畛問擬絞抵

題准部覆已於本年秋審本內聲明暫行扣除俟  
控案審明再行補入又周李氏係自縊身死亦  
據蓮花廳驗訊通詳各在案遵卽飭提人卷解

省委員審供由臬司邱樹棠審解前來臣隨提  
齊犯証逐一隔別研審緣周襄甫族姪周迪萬  
有烏石凹山場與李元棕族人李志陞隔里坡  
山場毘連李志陞之山向係李元棕同婿劉席  
畛租種道光二年五月周迪萬栽種山薯越過  
李元棕等山界經投劉巨賓等勸令周迪萬分  
認租銀二錢不允三年正月十五日李元棕邀  
同劉巨賓劉廣文復向周迪萬理處爭鬧周迪

萬毆傷劉巨賓左肩甲劉巨賓毆傷周迪萬左  
右胳膊等處劉廣文毆傷周迪萬左腿肚跑走  
周迪萬向李元棕毆打李元棕毆傷周迪萬左  
太陽等處跑走周迪萬追赶適劉席畛赴墟經  
見攔阻周迪萬斥護舉脚向踢劉席畛順取防  
身木拳心抵格致拳心鐵釘戳傷周迪萬左膝  
肋周迪萬用鋤亂毆劉席畛用拳心前後架格  
致傷周迪萬左腮腴等處周迪萬用鋤將拳心

格落劉席畛奪鋤毆傷周迪萬左膝肋周迪萬  
拳毆劉席畛心坎劉席畛用鋤橫毆適傷周迪  
萬左右膝蓋並鋤口劃傷右腿肚倒地逾時殞  
命報經前護廳張德元驗訊犯供游移稟府飭  
委前署廬陵縣陳徵芝會審屍弟周廣萬以劉  
席畛等糾夥謀殺等情控司並控經前撫臣程  
含章發交吉安府轉飭委員會審即據周廣萬  
遞悔呈明詳銷將劉席畛擬絞監候李元棕擬

杖劉巨賓等獲日另結由府司審解前護撫臣  
嵩溥審擬

題准部覆在案周廣萬先因缺用央周襄甫向族  
衆湊借七九錢一百千文周襄甫代為墊還族  
衆嗣周廣萬陸續付還周襄甫並將田租立契  
抵給該族祖祠祭穀向係周襄甫與周培甫經  
管四年三月周廣萬借穀二石約歲底還價十  
二月內周廣萬在鄰縣傭工將工資寄交其母

李氏轉還穀價周李氏挪用未付二十九日周  
培甫與周襄甫往取周李氏央緩不允爭鬧周  
李氏撲向拚命失跌倒地磕傷額顱經周金隴  
扶起周李氏聲言欲到周培甫家尋死又經周  
金隴勸慰各散詎周李氏氣忿莫釋潛赴周培  
甫屋後牛欄自縊殞命周培甫查見解救無及  
周廣萬聞信趕回邀同母族李元棕等往看因  
周李氏額顱有傷衣沾牛欄糞穢疑被周培甫

等灌糞毆逼一齊喧嚷周培甫走避周廣萬等  
趕至周襄甫家吵鬧欲控李元棕等旋即走回  
周襄甫畏累央周金隴等調處令周襄甫出錢  
為周李氏棺殮費用周廣萬欲圖抱贓出首假  
意應允周襄甫當寫錢票並將周廣萬抵欠田  
租立契轉賣共計七九錢八十八千文付周廣  
萬收執周襄甫欲周廣萬寫給甘休字據因周  
廣萬素不識字代起底稿捏寫周廣萬母家抬



屍抄搶等詞預防翻告央周金隴代騰周廣萬  
畫押交周襄甫收執周廣萬卽黏處和契票赴  
廳報驗周襄甫亦黏休字以李元棕等移屍糾  
搶等情具訴經前護廳何錫光驗訊李氏係失  
跌磕傷額顱自縊身死周襄甫等並無細毆灌  
糞情事將周李氏自縊正案通報其周廣萬首  
告賄和周襄甫指控糾搶因人証不齊致未審  
結周襄甫因寫給周廣萬契票原為免累起見

轉被呈首仍受訟累並疑李元棕等唆訟心懷  
忿恨起意赴京呈控憶及周迪萬被毆身死曾  
據屍弟周廣萬呈控劉席畛與李元棕等佔山  
謀殺隨指為李元棕率衆致斃並指該廳圖金  
賣法徇囑捏詳又周李氏自縊身死李元棕等  
曾赴叻鬧指為李元棕等移屍糾搶並因寫給  
契票處和指為周廣萬罵母逼縊索詐平空添  
砌踏死乳孩丁書舞弊各情冀圖聳聽並將李

姓族內平日有嫌及知名之人一並指控又將李元棕等族人被控及王清槐等控搶已結各案概行牽叙入詞以見李姓犯案多端官不究辦之意自行做就呈詞並黏舊存糧田串票藉圖影射山糧赴步軍統領衙門呈控奏奉

諭旨解回審辦茲經提審各供前情如繪臣以周襄甫所控該廳圖金賣法並周廣萬罵母致縊各情最關緊要再三嚴究不特劉席珍堅供實係

毆斃周迪萬正兇李元棕等與周廣萬僉稱並無行賄及罵母情事卽周襄甫亦自認聳聽捏控不諱詰訊不移案無遁飾查周襄甫呈控李元棕等致斃周迪萬係照周廣萬原詞指控其控該廳圖金賣法周廣萬罵母致縊並李元棕等移屍糾搶踏死乳孩均屬重情審係虛誣且全誣十人以上自應照例問擬周襄甫合依舊越赴京告重事不實並全誣十人以上例發邊

遠充軍到配杖一百折責安置周培甫向周李氏索欠並無威逼情狀第因此釀命應照不應重律杖八十周廣萬原控劉席畛等佔山謀命事出有因旋即遞悔呈明情同自首其母李氏自縊周襄甫寫給契票處和卽據呈首亦非私和惟率以灌糞細毆致縊具控究有不合周金隴因李氏自縊身死處令周襄甫給錢棺殮與私和應抵人命不同且受財人已經呈首因人

連累律得免議第明知周襄甫捏寫甘休字據並不斥阻輒代為照騰亦有不合周廣萬周金隴各照不應重律杖八十與周培甫各折責發落劉席畛致傷周迪萬身死久已擬絞題結應歸入下年秋審辦理李元棕毆傷周迪萬已於劉席畛命案擬杖發落其因周李氏自縊身死額顙有傷衣沾糞穢向周襄甫吵鬧旋即走回情尚可原應與訊無舞弊之刑書劉光策及被

牽控之李發槐等均免置議票錢田畝照追入  
官契票休字塗銷周襄甫原呈田糧串票給還  
李志陞周迪萬舊管山場仍照原案飭令釘界  
丈量陞科除全案供招咨部外理合恭摺具  
奏伏乞

皇上聖鑒敕部核覆施行奉

硃批刑部議奏

覆勘蓮花等廳縣及續報各縣被水被旱疏  
奏為藩司覆勘蓮花等廳縣及續報之新喻等縣  
被水被旱辦理情形恭摺仰懇

聖鑒事竊照蓮花萍鄉永新宜春安福廬陵分宜等  
七廳縣猝被水患應行照例撫卹緩徵錢漕及  
續報之新喻等縣被水被旱經臣一面

奏明一面飭令藩司繼昌馳往查勘督辦嗣據繼  
昌詳稱勘得蓮花等七廳縣猝被水患係因山



水驟發致有沖失田房淹斃人口等事幸消退甚速涸出之地業已補種雜糧未淹晚禾均屬暢茂次第刈穫委實勘不成災統計該七廳縣被淹民屯田地共七千三百八十九頃七畝零沖坍無力修復瓦草房三萬四千七百六間被水極次貧民大小口共二十萬九千九百五十六口被水之初卽經撫司道府暨各該廳縣及紳耆等捐資撫卹並減糶倉穀尚不致口食無

資惟窮黎貯蓄均被漂沒自不能不籌資接濟  
應於十一月內無論極次貧民照例普行撫卹  
一月折色口糧並卹給無力之家坍房修費共  
計口糧修費須銀五萬七千七百一十六兩零  
仍緩徵錢漕以紓民力體訪輿情實可無虞失  
所至淹斃人口先經地方官暨紳士捐資殮埋  
無庸再行查辦水沖沙壓田畝內有實在不能  
墾復者催令確切勘丈照例辦理已經挑復各

戶不必另給籽種工本浸濕常平倉穀俱已分別晒晾減價糶賣飭令買補還倉具報沖丹城垣衙署監獄祠宇等項現值停止工程未便請項應請由外另辦其浸濕軍裝火藥淹斃營馬並捐助銀穀各官紳雖已由司將紳耆分別獎勵仍應確核銀數穀數分別照例辦理至續報之泰和縣沿河一帶居民因上游水發間被淹浸業經該縣捐廉撫卹茲逐一履勘田禾並無

妨碍民情極為安貼委實毋庸查辦惟新喻吉  
水二縣並下游之南昌縣或先因夏秋雨澤愆  
期或因上游水發間被漫淹迨後雖補種雜糧  
於收成大局並無妨碍勘不成災然究未免歉  
薄若將本年應徵帶徵錢漕一律照常徵收誠  
恐民力未逮等情臣細加體察委均實在情形  
正在繕摺具

奏間茲於十月十四日欽奉

上諭韓文綺奏勘明被水廳縣請照例撫卹一摺着照所請准將蓮花等七廳縣被水各戶無論極次貧民照例普行撫卹一月折色口糧其沖坍房屋淹斃人口並水衝沙壓田畝除有力之家並已經捐給外均着照例卹給至該廳縣本年未完錢漕並准其緩至來年秋後分作兩年帶徵其餘被旱被水各州縣着一並查明核辦等因欽此遵卽轉行欽遵除淹斃人口水沖沙壓已經挑復田畝

無庸卹給外將應普行撫卹一月折色口糧及  
沖坍房屋修費發給各該管道府督同印委各  
員於十一月內核實散放一面敬謹謄黃頒佈  
俾家喻戶曉使吏胥無從滋弊窮黎咸沾實惠  
感頌

皇仁自無旣極所有續報被水被旱之南昌新喻吉  
水三縣雖勘不成災而收成歉薄民力未免拮  
据合無仰懇

皇上天恩俯准將南昌吉水二縣被水被旱田畝本年應徵錢漕緩至來年秋後徵收新喻縣被水被旱田畝較多本年應徵錢糧漕米緩至來年秋後分作兩年帶徵其南昌縣本年應帶徵五年緩徵錢漕遞緩至道光八年秋後起徵又七年帶徵三年遞緩錢漕遞緩至道光九年秋後徵收以期仰副

聖主愷澤覃施惠愛黎元有加無已至意除飭將蓮

花等七廳縣不能墾復田畝及浸濕軍裝火藥  
淹斃營馬暨地方官並各紳耆捐助銀穀並用  
過卹給銀兩同續報之南昌等三縣應徵錢漕  
年分數目分別核實照例辦理外理合恭摺具  
奏伏乞

皇上聖鑒訓示內閣奉

上諭韓文綺奏續報被水被旱地方請分別緩徵一  
摺江西南昌等三縣或因夏秋雨澤愆期或因上



游水發被淹雖均勘不成災而收成歉薄民力未免拮据着照所請加恩將南昌吉水二縣被水被旱田畝本年應徵錢漕着緩至來年秋後徵收新喻縣被水被旱田畝本年應徵錢漕着緩至來年秋後分作兩年帶徵其南昌縣本年應帶徵道光五年緩徵錢漕准其遞緩至道光八年秋後啟徵又來年應帶徵道光三年遞緩錢漕准其遞緩至道光九年秋後徵收以紓民力該部知道

遵旨查明覆奏疏

奏為遵

旨查明覆

奏仰祈

聖鑒事竊臣承准

廷寄欽奉

上諭本年江西蓮花等七廳縣被水已降旨加恩小  
民諒不至失所惟念來春青黃不接之時民力不

免拮据着體察情形如有應需接濟之處卽查明  
據實覆奏務於封印前奏到候朕於新正降旨加  
恩再新喻等三縣被水被旱已據奏明委員查勘  
亦着迅速辦理並將來春應否接濟之處一並查  
明於封印前奏到等因欽此仰見我

聖主軫念民依無微不至佩讀之下欽跪實深伏查  
蓮花萍鄉永新宜春安福廬陵分宜等七廳縣  
猝被水患業蒙

恩旨准將被水各戶無論極次貧民普行撫卹一月  
折色口糧並無力之家卹給坍房修費又復緩  
徵錢漕

隆施稠疊該七廳縣貧民無不仰戴

皇仁同深感頌卽續報被水被旱各縣亦經藩司親  
詣勘明於十月十七日奏懇

天恩請將南昌新喻吉水三縣本年應徵帶徵錢漕  
分別緩徵遞緩已足以紓民力今復以來春青

黃不接之時民力不免拮据上廩

聖懷遵卽恭錄

恩旨飭司查辦茲據藩司繼昌議詳前來臣覆與該  
司細加體察內南昌分宜新喻吉水安福等五  
縣被水被旱田地補種雜糧均已收穫菜麥亦  
一律芄茂民力不致竭蹶自可無庸接濟惟蓮  
花萍鄉宜春廬陵永新等五廳縣被水村庄雖  
雜糧有收現在無虞缺食惟該五廳縣貧農素

鮮蓋藏經本年水患之後來春東作方殷恐播  
種難免匱乏合無仰懇

聖恩俯准將該五廳縣貧農於來春青黃不接之時  
再行酌借籽種俾耕作有資庶生計更臻寬裕

感沐

鴻慈益無既極理合恭摺據實覆

奏伏乞

皇上聖鑒訓示

審擬豐城縣民熊大邦京控疏

奏為衆證明白犯供狡展循例審擬

奏請

定奪仰祈

聖鑒事竊據豐城縣民熊大邦以該縣違例浮收兵  
捕逼擾縣書左曲二攬管庫糧稅總勒索分肥  
捕役蕭昇等妄挐索詐等情控經都察院咨解  
到江交臣委員審辦當卽行提人卷解省委員

確審衆證明白卽熊大邦亦自認並無實據仍一味堅不輸服由司道親訊詳請審奏前來臣細核各卷親提犯證隔別研鞫緣熊大邦先於乾隆六十年間聽從趙君山赴京呈控該縣浮收銀米經前戶部侍郎臣台布來江會同前署督臣蘇凌阿審虛將熊大邦問擬滿徒發配限滿釋回充當錢漕催頭誑騙津貼兌費並捏錢糧應須火工等項刊刷條規分散各圖經縣差



拘熊大邦畏懼復將所斂錢文倡建廟宇侵蝕  
餘錢被雷劍光赴京呈控解回審明將熊大邦  
照兇惡棍徒例問發四川安置恭逢嘉慶二十  
五年八月二十七日

恩詔釋回於道光四年二月到籍十月內該縣尚未  
示期開倉熊大邦復萌故態起意包攬漁利編  
造平漕議約以乾隆六十年經伊京控始得平  
斛今代合邑議一章程每米一擔幫官雜費水

脚等錢三百文經承社保公局首事錢五十文  
俱要歸局等語張大其詞獨自起稿雇人刊刷  
數十本於十月初八日攜赴縣城真人廟與僧  
隱波商允卽在廟內設局初九日熊大邦邀同  
素好之監生陳質明民人羅茂二在逃之曾有  
義至廟告知情由給看議約令其幫做首事分  
散議約騙錢均分陳質明等貪利允從是日有  
花戶楊明德社保徐英彩走至熊大邦當向攬

納漕米各給議約一本逼令通知花戶按戶完  
米赴局交錢楊明德等畏其兇橫勉強收回議  
約當即燒燬並未向花戶通知餘約熊大邦尚  
未分散亦未騙得錢文經該前縣徐清選訪聞  
差拘查獲議約稟經前護撫臣嵩溥飭委前署  
臨江府劉體重等馳往查拏並經前撫臣成格  
抵任查核議約語言狂妄挾制居民抗官把持  
亟應懲辦添委前任南昌府周繼炘會營督率

兵役嚴拏並附片奏

聞在案熊大邦遠颺無獲經縣詳咨通緝嗣獲陳質明等解省委員審明將陳質明羅茂二僧隱波照為從律於熊大邦應得軍罪上減一等各杖一百徒三年聲明熊大邦獲日另結詳經咨部照覆熊大邦因各省查拏嚴緊起意赴京翻控洩忿自行砌詞逼令伊甥曾榮發作抱一同進京赴都察院呈控咨解回江查熊大邦所控該

縣浮收錢漕稅契小業不黏契尾官吏私蝕一節訊因豐邑鄉斛小於制斛七八折不等花戶以鄉斛量交原有多寡倉內總以制斛收米皆係平斛嚮攬並無十五六斛僅算十斛及每石收足錢七百五十文零星小戶完納丁耗均係按照市價長落用錢折納豐邑市用七一四錢每千只有足錢七百十四文扣足制錢收納並無每兩收足錢一千八百八十文漕糧串票小

戶給錢二文大戶給錢三文不等俱係花戶情  
愿照舊給付並無多索徵收稅契均係每兩徵  
銀三分亦無契價七八百作價一兩徵銀六分  
幾釐並契尾每張勒錢四五百文業戶原有數  
契黏連請用契尾一張係便於收藏仍按契價  
一併合算填入契尾並非徵多報少亦非小業  
不黏契尾官吏實無私蝕情弊飭令現任知縣  
吊查紅簿及申繳尾根銀號各數並業戶鄔樂

三等黏連各契均屬相符摘傳花戶訊亦無異  
詰訊熊大邦據稱得自傳聞是以指控此外別  
無確據又如所控縣書左曲二攬管庫糧稅總  
勒索分肥武舉袁桂鬧堂罵官左曲二許加銀  
米一節訊因左曲二先充戶房經承後經告退  
充當清書道光三年收漕左曲二在倉幫同經  
承填寫串票看視米色花戶上米左曲二故意  
挑剔有給錢十餘文並數十文不等共得過錢

八千四百文並未承充庫糧稅總亦無分肥簿  
據武舉袁桂訊無鬧堂罵官經左曲二許定舊  
規並加給銀米之事因熊大邦從前倡議建廟  
勒派錢文不允控縣後又於雷劍光京控案內  
作證將熊大邦擬軍熊大邦因此挾嫌平空妄  
誣詰訊熊大邦亦稱得自傳聞並無確據又如  
所控兵捕逼擾挈去家屬親朋等用錢買放並  
將僧人刑傷拖斃捕役蕭昇等索詐伊族錢文



蕭昇之兄國賊被挖雙目一節訊因熊大邦倡立平漕議約經縣訪臬飭委文武員弁督率兵役嚴拏熊大邦逃逸蕭昇恐被比責令其家屬親友找尋曾經用言恐嚇並無將僧人拖斃卽有牽連獲案者均經委員隨時訊釋兵捕人等均無逼擾吊打並得錢賣放蕭昇等亦無向熊大邦族人詐過錢一百六十千文至蕭昇之兄蕭有三因有乞丐染匠大漢子等在村盤踞強

討驅逐出村被染匠大漢子挾嫌扭倒騎壓身  
上用指挖瞎雙目報縣詳緝有案並非固賊被  
挖詰訊熊大邦究係何處僧人拖斃兵役將何  
人得錢賣放伊族及親朋有何人被蕭昇等詐  
錢據稱均在途中風聞不能供出實據總求嚴  
究又如所控該縣每年運官往來官差上下衙  
門年節生日開銷錢文外尚有詞訟各弊等銀  
一節訊明該縣歷年收漕向在水次兌運運官

人等查看米色兌竣開行並無賄給銀錢往來  
官員歷無承辦差使上下衙門亦無餽送節壽  
禮物歷任知縣審理詞訟均屬平允實無賄囑  
情弊俱係熊大邦平空捏誣詰訊熊大邦亦稱  
均得自傳聞私猜不能指出確據等供臣以熊  
大邦所控各款均屬重情恐官役人等實有情  
弊再三嚴究不特書役人等堅供不移卽熊大  
邦亦自稱得自傳聞私猜並無確切證據其為

妄控無疑自應訊取輸服供招乃熊大邦冀圖  
拖累無辜明知罪無可加一味刁狡堅不畫供  
查例載問刑衙門審辦案件其有實在刁健堅  
不承招卽具衆證情狀奏請

定奪等語此案熊大邦始則聽從誣告問徒繼又斂  
錢勒派擬軍遇

赦釋回不知安分復敢剋刷平漕議約煽惑鄉民指  
官誑騙實為棍徒之尤提齊衆證確審明白卽

該犯亦供認所控各情毫無憑據乃仍未輸服  
更屬刁健未便因其堅不承招稽延不結熊大  
邦除驀越赴京告重事不實輕罪不議外合依  
兇惡棍徒屢次生事行兇無故擾害良人例發  
極邊足四千里安置係

赦後復犯應加一等改發雲貴兩廣極邊烟瘴充軍  
照例奏請

定奪左曲二訊未承充庫糧稅總亦無浮勒分肥情

事惟充當清書藉看米色故意挑剔得過花戶  
錢八千四百文折實銀八兩四錢卽與蠹役詐  
贓無異左曲二卽左維謙應照蠹役索詐貧民  
計贓六兩至十兩例杖一百徒三年各照例刺  
字捕役蕭昇訊無逼擾作贓惟奉票拘人輒令  
該家屬親友找尋用言恐嚇亦有不合應與被  
逼同行之抱告曾榮發各照不應重律杖八十  
折責發落聽從散約之陳質明羅茂二僧隱波

先已擬徒咨結應毋庸議所有失察衙役詐贓  
職名係前任豐城縣現調南昌縣知縣徐清選  
相應附叅聽候部議除將供招咨部外理合恭  
摺具

奏伏乞

皇上聖鑒敕部核覆施行奉

硃批刑部議奏

覆查保甲完竣疏

奏為覆查保甲完竣恭摺仰祈

聖鑒事竊照嘉慶二十年正月欽奉

上諭編查保甲州縣於秋收後俟各項外出人衆歸里  
曉諭各村莊保長人等將本村戶口自行逐細查明  
造具草冊呈送州縣覆查將門牌改填按戶懸掛仍  
責令該管道府直隸州親往協查稟報督撫交兩司  
核對具詳歲底彙奏一次等因欽此又於道光四年



五月欽奉

上諭着各督撫等嚴飭該府州縣將棚民逐細查察  
每年遞換門牌隨時抽驗如查有不安本分之徒  
卽嚴挈示懲不准書吏藉端擾累等因欽此當經  
前撫臣毓岱查明江西棚民向已編入保甲

奏明俟秋收後一律查辦在案茲本年秋收後各  
項外出人衆俱已歸里據各州縣督率保長及  
族正人等將土著及棚民一體確查改換門牌

懸掛並查各棚民均皆安靜守法經該管道府  
直隸州親加覆查相符報由兩司核詳前來臣  
逐細體訪所屬地方以及本年被水之區俱各  
安貼委無匪徒潛匿情事並仍飭各屬實力奉  
行隨時查察不得因本年編查業已完竣稍有  
疎懈以仰副

聖上戢暴安良之至意所有覆查保甲完竣緣由理  
合恭摺具

奏伏乞

皇上聖鑒